

全宋词

第二部

赵子发

鹧鸪天

约略应飞白玉盘。明楼渐放满轮寒。天垂万丈清光外，人在三秋爽气间。

闻叶吹，想风鬟。浮空仿佛女乘鸾。此时不合人间有，尽入嵩山静夜看。

洞仙歌

荒山明月，下有云来去。深夜纤毫静可数。问古今底事，留此空光，修月户、犹是当年玉斧。

思君持羽扇，来伴微吟，水珮风环饮松露。待勾漏丹成，约与轻飞，人间世、不知归处。更长啸、余声振林谿，见乱红惊飞，半岩花雨。

桃源忆故人

芳菲已有东风露。寒著轻罗未去。午夜鸾车鹤驭。散入千莲步。

粉香度曲嬉游女。草草相逢无据。肠断泪零无数。洒作花梢雨。

浣溪沙

疏荫摇摇趁岸移。惊鸥点点过帆飞。船分水打嫩沙回。
断梦不知人去处，卷帘还有燕来时。日斜风紧转湾西。

南歌子

天末疑无路，波翻欲御风。此身忽在玉壶中。醉倒不知、
南北与西东。

猎猎遥鸣草、飕飕静打篷。与君回棹碧云浓。不是思归、
只为酒船空。

南歌子

人有纫兰佩，云无出岫心。扁舟来入碧涛深。坐见楚咻、
儿女变齐音。

但醉双瓶玉，从渠六印金。此时何处可幽寻。风定津头、
白日照平林。

点绛唇

野岸孤舟，断桥明月穿流水。雁声嘹唳。双落行人泪。
去岁吾家，曾插黄花醉。今那是。杖藜西指。看即成千里。

虞美人

飞云流水来无信。花发年年恨。小桃如脸柳如眉。记得那人模样、旧家时。

楼高映步拖金缕。香湿黄昏雨。如今不见欲凭书。门外水平波暖、一双鱼。

惜分飞

数点雨声惊残暑。帘外秋光容与。重换熏炉炷。渐低罗幕香成雾。

今夜夜凉情几许。莫向屏山取取。却笑阳台女。楚人空□高唐赋。

阮郎归

马蹄踏月响空山。梅生烟壑寒。水妃去后泪痕干。天风吹珮兰。

纫香久，怕花残。与君聊据鞍。一枝欲寄北人看。如今行路难。

忆王孙

日长高柳一蝉声。翡翠帘深宝簟清。梦远春云不散情。晓风轻。玉楝花飞宿雨晴。

杨柳枝

淅淅西风生暮寒。绣衣单。碧梧叶落藕花残。恨前欢。月楼虚棹烟逗竹，梦千山。玉箫清夜忆孤鸾。镇长闲。

望江南

新梦断，久立暗伤春。柳下月如花下月，今年人忆去年人。往事梦中身。

菩萨蛮

闲庭草色侵阶绿。琐窗午梦人如玉。抛枕出罗帏。风吹金缕衣。

怨春风雨恶。二月桃花落。雨后纵多晴。花休春不成。

少年游

晓山日薄半春阴。烟暖柳拖金。满眼新晴，歌声妆影，悠荡碧云心。

闲庭客散人归去，疏雨湿罗襟。楼阁濛濛，断虹明处，十里暮云深。

采桑子

春蚕昨夜眠方起，闲了罗机。共采柔枝。桑柘阴阴三月时。背人佯笑移金钏，惆怅花期。故故留迟。独自归来雨满衣。

浪淘沙

约素小腰身。不奈伤春。疏梅影下晚妆新。袅袅娉娉何样似，一缕轻云。

歌巧动朱唇。字字娇嗔。桃花深处一通津。怅望瑶台清夜月，还送归轮。

徐 俯

浣溪沙

章水何如颍水清。江山明秀发诗情。七言还我是长城。
小小钿花开宝靥，纤纤玉笋见云英。十千名酒十分倾。

虞美人

梅花元自江南得。还醉江南客。雪中雨里为谁香。闻道数
枝清笑、出东墙。

多情宋玉还知否。梁苑无寻处。胭脂为萼玉为肌。却恨恼
人桃杏、不同时。

卜算子

心空道亦空，风静林还静。卷尽浮云月自明，中有山河影。
供养及修行。旧话成重省。豆爆生莲火里时，痛拨寒灰冷。

卜算子

天生百种愁，挂在斜阳树。绿叶阴阴占得春，草满莺啼处。
不见生尘步。空忆如簧语。柳外重重叠叠山，遮不断、愁来路。

卜算子

清池过雨凉，暗有清香度。缥缈娉婷绝代歌，翠袖风中举。
忽敛双眉去。总是关情处。一段江山一片云，又下阳台雨。

鹧鸪天

绿水名园不是村。淡妆浓笑两生春。笛中已自多愁怨，雨里因谁有泪痕。

香旖旎，酒氤氲。多情生怕落纷纷。旧来好事浑如梦，年少风流付与君。

鹧鸪天

满眼纷纷恰似花。飘飘泊泊自天涯。雨中添得无穷湿，风里吹成一道斜。

银作屋，玉为车。姮娥青女过人家。应嫌素面微微露，故

着轻云薄薄遮。

踏莎行

素景将阑，黄花初笑。登高一望秋天杳。邀宾携妓数能来，醉中赢得闲多少。

佳气氤氲，飞云缥缈。竹林更着清江绕。高歌屡舞莫催人，华筵直待华灯照。

踏莎行

画栋风生，绣筵花绕。层台胜日频高眺。清辉爽气自娱人，何妨称意开颜笑。

水碧无穷，山青未了。斜阳浦口归帆少。云鬓烟鬓只供愁，琵琶更作相思调。

踏莎行

玉露团花，金风破雾。高台与上晴空去。举杯相属看前山，烟中乱叠青无数。

皓齿明眸，肌香体素。恼人正在秋波注。因何欲雨又还晴，歌声遏得行云住。

南歌子（山樊）

细蕊黄金嫩，繁花白雪香。共谁连壁向河阳。自是不须汤饼、试何郎。

婀娜拔松髻，轻盈淡薄妆。莫令韩寿在伊傍。便逐游蜂惊蝶、过东墙。

鹧鸪天

宜笑宜颦掌上身。能歌能舞恶精神。脸边红入桃花嫩，眉上青归柳叶新。

娇不语，易生嗔。尊前还是一番春。深杯百罚重拚却，只为妖饶醉得人。

浣溪沙

西塞山前白鹭飞。桃花流水鳜鱼肥。一波才动万波随。黄帽岂如青箬笠，羊裘何似绿蓑衣。斜风细雨不须归。

浣溪沙

新妇矶边秋月明。女儿浦口晚潮平。沙头鹭宿戏鱼惊。青箬笠前明此事，绿蓑衣底度平生。斜风细雨小舟轻。

鹧鸪天

西塞山前白鹭飞。桃花流水鳊鱼肥。朝廷若觅元真子，晴在长江理钓丝。

青箬笠，绿蓑衣。斜风细雨不须归。浮云万里烟波客，惟有沧浪孺子知。

鹧鸪天

七泽三湘碧草连。洞庭江汉水如天。朝廷若觅元真子，不在云边则酒边。

明月棹，夕阳船。鲈鱼恰似镜中悬。丝纶钓饵都收却，八字山前听雨眠。（张志和渔父词云：“西塞山前白鹭飞。桃花流水鳊鱼肥。青箬笠、绿蓑衣。斜风细雨不须归。”顾况渔父词云：“新妇矶边月明。女儿浦口潮平。沙头鹭宿鱼惊。”东坡云：“元真语极丽，恨其曲度不传，加数语以浣溪沙歌之云：“西塞山前白鹭飞。散花洲外片帆微。桃花流水鳊鱼肥。自庇一身青箬笠，相随到处绿蓑衣。斜风细雨不须归。”山谷见之，击节称赏，且云：惜乎散花与桃花字重叠，又渔舟少有使帆者。乃取张顾二词，合为浣溪沙云：“新妇矶边眉黛愁。女儿浦口眼波秋。惊鱼错认月沉钩。青箬笠前无限事，绿蓑衣底一时休。斜风细雨转船头。”东坡跋云：“鲁直此词，清新婉丽，问其最得意处，以山光水色，替却玉肌花貌，真得渔父家风也。然才出新妇矶，便入女儿浦，此渔父无乃太澜浪乎。”山谷晚年亦悔前作之未工，因表弟李如篴（言，渔父词以鹧鸪

天歌之，甚协律，恨语少声多耳。因以宪宗画像求元真子文章及元真之兄松龄劝归之意，足前后数句云：“西塞山前白鹭飞。桃花流水鳜鱼肥。朝廷尚觅元真子，何处如今更有诗。青箬笠，绿蓑衣。斜风细雨不须归。人间欲避风波险，一日风波十二时。”东坡笑曰：“鲁直乃欲平地起风波也。”东湖老人因坡、谷互有异同之论，故作浣溪沙、鹧鸪天各二阕云。）

念奴娇

素光练静，照青山隐隐，修眉横绿。鹄鹊楼高天似水，碧瓦寒生银粟。万丈辉光，奔云涌雾，飞过卢鸿屋。更无尘翳，皓然冷浸梧竹。

因念鹤发仙翁，当时曾共赏，紫岩飞瀑。对影三人聊痛饮，一洗闲愁千斛。斗转参移，翻然归去，万里骑黄鹄。一川霜晓，叫云吹断横玉。

王安中

虞美人（雁门作）

千山青比妆眉浅。却奈眉峰远。玉人元自不禁秋。更算恼伊深处、月当楼。

分携不见凭阑际。只料无红泪。万千应在锦回纹。嘱付断鸿西去、问行云。

浣溪沙（看雪作）

慵整金钗缩指尖。晓□犹自入疏帘。绿窗清冷脸红添。
妒粉尽饶花六六，回风从斗玉纤纤。不成香暖也相兼。

玉楼春

秋鸿只向秦筝住。终寄青楼书不去。手因春梦有携时，眼到花开无著处。

泥金小字蛮笺句。泪湿残妆今在否。欲寻巫峡旧时云，问

取阳关西去路。

绿头鸭（大名岳官作）

魏都雄，凤皇飞观云间。佩麟符、荀池元老，暂辞西省仙班。憩甘棠、地澄远籁，咏华黍、河卷惊澜。碧革萋迷，丹毫冷落，圆扉铃索镇长闲。绣筵展、三台星近，锵玉韵珊珊。金尊滢、新醅方荐，薄暑初残。

政成时、欢余客散，后园朱户休关。度秋风、画阑枕水，挂夜月、雕槛骑山。锦帐笼香，鸾钗按曲，琵琶双转语绵蛮。劝行□、傍眉黄气，先报袞衣还。登庸际，应褒旧德，喜动天颜。

北山移文哨遍

嵩少为仕宦捷径者，读而羞之，是足为勇退者之鼓吹。阳翟蔡侯原道，恬于仕进。其内吕夫人有林下风。相与营归欤之计而未果，则嘱予以此文度曲，且朝夕使家童歌之，亦可想见泉石之胜。其词曰：)

世有达人，潇洒出尘，招隐青霄际。终始追。游览老山栖。藐千金、轻脱如屣。彼假容江皋，滥巾云岳，纓情好爵欺松桂。观向释谈空，寻真讲道，巢由何足相拟。待诏书来起便驹驰。席次早焚烈茱萸衣。敲朴喧喧，牒诉匆匆，抗颜自喜。

嗟明月高霞，石径幽绝谁回睇。空怅猿惊处，凄凉孤鹤嘹唳。任列壑争讥。众蜂竦谄，林惭涧愧移星岁。方浪檣神京，

腾装魏阙，徘徊经过留憩。致草堂灵怒蒋侯麾。扁岫幌、驱烟勒新移。忍丹崖碧岭重淬。鸣湍声断深谷，逋客归何计。信知一逐浮荣，便丧素守，身成俗士。伯鸾家有孟光妻。岂逡巡、眷恋名利。

菩萨蛮（六军阅罢，犒饮兵将官）

中军玉帐旌旗绕。吴钩锦带明霜晓。铁马去追风。弓声惊塞鸿。

分兵闲细柳。金字回飞奏。犒饮上恩浓。燕然思勒功。

御街行（赐衣袄子）

清霜飞入蓬莱殿。别进云裘软。却回宸虑念多寒，诏语日边亲遣。冰蚕绵厚，金雕锦好，永夜缝宫线。

红旗绛旆迎星传。喜气欢声远。庙堂勋旧使台贤，领袖坐中争绚。天香馥郁，君恩岁岁，一醉春生面。

鹧鸪天（百官传宣）

蒨雾红云捧建章。鸣珂星使渡银潢。亲将圣主如丝语，传与陪都振鹭行。

香袅袅，□锵锵。升平歌管趁飞觴。明时玉帐恩相续，清夜钧天梦更长。

蝶恋花

（花公莫爱，四时俱好是长春。）

曲径深丛枝袅袅。晕粉揉绵，破蕊烘清晓。十二番开寒最好。此花不惜春归早。

青女飞来红翠少。特地芳菲，绝艳惊衰草。只滞东风终甚了。久长欲伴姮娥老。

蝶恋花

（飞雪映山茶。）

巧剪明霞成片片。欲笑还嚬，金蕊依稀见。拾翠人寒妆易浅。浓香别注唇膏点。

竹雀喧喧烟岫远。晚色溟蒙，六出花飞遍。此际一枝红绿眩。画工谁写银屏面。

蝶恋花

（高奇是蜡梅。）

剪蜡成梅天著意。黄色浓浓，对萼匀装缀。百和薰肌香旖旎。仙裳应渍蔷薇水。

雪径相逢人半醉。手折低枝，拥髻云争翠。嗅蕊捻枝无限思。玉真未洒梨花泪。

蝶恋花

（先发看红梅。）

青玉一枝红类吐。粉颊愁寒，浓与胭脂傅。辨杏猜桃君莫误。天姿不到风尘处。
云破月来花下住。要伴佳人，弄影参差舞。只有暗香穿绣户。昭华一曲惊吹去。

蝶恋花

（花发自迎春。）

雪霁花梢春欲到。饯腊迎春，一夜花开早。青帝回舆云缥缈。鲜鲜金雀来飞绕。
绣阁纱窗人窈窕。翠缕红丝，斗剪幡儿小。戴在花枝争笑道。愿人常共春难老。

蝶恋花

（娇红看小桃。）

秾艳天桃春信漏。弄粉飘香，枫叶飞丹后。酒入冰肌红欲透。无言不许群芳斗。
楼外何人揜翠袖。剪落金刀，插处浓云覆。肯与刘郎仙去否。武陵回路相思瘦。